

Obraćanje visokog predstavnika Paddy Ashdowna na konferenciji za medije o sljedećoj fazi javne informativne kampanje o reformi policije

Hvala vam što ste došli danas kada predstavljamo zadnji element javne informativne kampanje koja traje od mjeseca januara.

Zadovoljstvo mi je što vam mogu prikazati dva nova TV spota koji će se danas prikazati po prvi put i koji se planiraju prikazivati tokom cijelog mjeseca aprila.

Približavamo se trenutku kada će Evropska unija dati novu ocjenu napretka koji je ostvarila BiH u pogledu ispunjenja zahtjeva postavljenih u Studiji izvodljivosti. U maju mjesecu tekuće godine, eksperti Evropske unije stići će u BiH kako bi ocijenili napredak koji BiH ostvaruje po pitanju ispunjenja šesnaest uvjeta koji su BiH postavljeni Studijom izvodljivosti u cilju otpočinjanja pregovora za potpisivanje Sporazuma o stabilizaciji i pridruživanju.

Značajno je napomenuti da smo svjedoci poboljšanja saradnje sa Haškim tribunalom u BiH; protekle sedmice, Vinko Pandurević je postao 5. optuženi za ratne zločine kojeg je ove godine Republika Srpska prebacila u Hag; nakon devet godina nedjelovanja i opstrukcija ovo je jako pozitivan razvoj događaja.

Naravno, ovaj proces će se okončati tek onda kada svi

optuženici koji su još uvijek na slobodi, uključujući Radovana Karadžića i Ratka Mladića, budu prebačeni u Hag – ali ovo su ohrabrujući znaci napretka za EU.

Ukoliko se ovaj napredak nastavi, to znači da bi reforma policije mogla ostati posljednje veliko pitanje koje se mora riješiti prije nego BiH otpočne pregovore o Sporazumu o stabilizaciji i pridruživanju.

U pogledu toga, drago mi je što mogu reći da se razgovori o restrukturiranju policije sve više i više usredotočuju na elemente same reforme – ostavljamo za sobom fazu instiktivne, negativne reakcije na promjenu, te ulazimo u konstruktivan period pregovora o ovoj reformi.

Zadovoljan sam što postoji općenito prihvatanje svih strana u BiH da se sada krećemo ka fazi formalnijih diskusija.

Dozvolite mi da vam predočim vremenski raspored, onako kako ga ja vidim:

Sredinom mjeseca maja možemo očekivati dolazak Konsultativne radne grupe Evropske komisije u BiH koja će ocijeniti napredak koji je ostvarila BiH u pogledu 16 uvjeta sadržanih u Studiji izvodljivosti.

Ukoliko ih želimo uvjeriti da je napredak ostvaren, te da postoji ozbiljna opredijeljenost za reforme, onda nam je potreban sporazum koji će jasno pokazati da sve zakonodavne institucije BiH podržavaju reformu koja predstavlja odraz tri osnovna zahtjeva Evropske unije u pogledu ove reforme;

Prvo, dati isključivu nadležnost za zakonsku regulativu kojom se regulira policija, te budžet na državni nivo.

Drugo, urediti regionalna policijska područja na osnovu funkcionalnih policijskih kriterija, i

Treće, zaštititi policiju od neadekvatnog političkog

uplitanja.

Značajno je naglasiti da Evropska unija neće promijeniti svoje standarde ili uslove: ako se neko još uvijek tome nada, veoma griješi.

Krajem ovog mjeseca strane će se pozvati da otpočnu zvanične pregovore o restrukturiranju policije.

Mada se tri uslova Evropske unije moraju ispuniti, postojaće prostor za kompromis.

Dakle, da pogledamo kampanju koju danas pokrećemo.

Ovi spotovi su se počeli prikazivati danas; gledaoci FTV su bili prvi koji su ih mogli vidjeti jutros u 8:00 sati.

Spotovi će se prikazivati na vodećim TV mrežama u BiH tokom naredne četiri sedmice. "Svijetleći" poster i u sklopu ove TV kampanje su se danas također pojavili širom BiH.

Kampanjom se pojačava poruka da će jedinstvena policijska struktura:

- Pomoći da se policija oslobodi političkog uplitanja.
- Pružiti policajcima profesionalnu službu uz pristup modernoj opremi, mogućnosti za napredovanje u službi i bolje plate, beneficije i obuku.
- Da je planirana na osnovu tehničkih, policijskih kriterija od strane policijskih profesionalaca u cilju stvaranja efikasnog policijskog okruženja, i
- Da to predstavlja uslov za pridruživanje EU.

Medijska i javna informativna kampanja OHR-a se provodi zajedno sa kampanjom koju provodi EUPM i putem okruglih stolova širom BiH koje organiziraju OHR i EUPM.

Sadašnji policijski sistem u BiH je isuviše kompliciran, preskup i nedovoljno efikasan u borbi protiv kriminala.

Restrukturiranjem policije će se prevazići sistemski nedostaci u organizaciji policije u BiH. Restrukturiranjem se obezbjeđuju sredstva za postizanje najbolje evropske prakse u pružanju efikasnih policijskih usluga građanima BiH.

Podaci o producentima, troškovima i sl. se mogu dobiti nakon ove konferencije.

Da li neko ima pitanja...?